

DANIEL

Jawen unanmati janchaki

Ja año 605 Cristo judiamatian Jerusalén anuabu iyukin Daniel inun jawen 3 jaibuaibu Babilonia anu Nabucodonosorin jatu iyunikiaki. Diosun jancha inun jawen pe jiwekunkainti beya Danielin jawa jeneama betsabu dasibibu binukubainkin Babilonia xanen ibujaida Nabucodonosor inun, Media nawabu xanen ibujaida Darío inun, Persia nawabu xanen ibujaida Ciro Danielin jatu dayaxunkunkainikiaki. Bikabiaken jaska Danielin Diosun jancha chibankin jeneama ikunkaini jakidi tapinkin jabiaskadi nun idiatidubuki.

Israelin enabu ja dukun Babilonia anu jatu iyukin taewanibukiaki, na janchadan

1 ¹ Judán enabun mai pakea anuxun jatu yunui Joaquim xanen ibujaidakunkaini ma 3 año kaya Babilonia xanen ibujaida Nabucodonosor jawen detenamenikabu ichapabube jikitan Jerusalén kebauni nati ikabu ² jawenabu jau jatu achinun Nabucodonosor Jehován jenea Nabucodonosor jawen detenamenikabubetan Jerusalén achiabu ja kachu jikikain Judán enabu xanen ibujaida Joaquim achitan januxun Judán enabu mai pakea anuabu jawen tsuma jatu watan januxun jawen kushipawen Templo anua jawen kenwanti mabu medibi Jehována ichapa jau bikin ichawanunbun Nabucodonosorin jawen tsumabu jatu yunua bikin ichawaibun junibu pepabu katuxun jabu inun ja mabu medibi Babilonia anu Nabucodonosorin jatu bumakin Babilonia anu bichiabu jawen yushibu kenwanti jiwe janu mabu meketi dintu anu Dios kenwanti mabu medibi Nabucodonosorin jatu adumanikiaki. ³⁻⁴ Ja dikabi Israelin enabu jatu iweshinxun xanen ibubun enabu inun mabuya pepabun enabu anua bedunanbu pepabu jawendua inun, jawen yuda jawa chakabu jayabuma inun, jawaida tapinkin ninkatidubu inun, xanen ibun jiwe jawendua anuxun jawa bika teneama medabewakubaintidubu jatu katuxun Caldea nawabun jancha inun jatun una kene jau jatu yusinkubainxanunbun jawen jiwe jawendua anu jawen dayadubu

yununika jawen kena Aspenaz Nabucodonosorin jatu yunua Israelin enabu bedunanbu unanmakubainkin bedunan juni pepabus jatu katubainima ⁵januxun 3 año ja bedunanbu jatu yusinkubainkin jabias xanen ibun piti inun nuxuti vino xanen ibujaida inanmisbu xaba tibi jau jatu pimakubainxanunbun Nabucodonosorin jatu yunudianikiaki.

Daniel inun jawen jaibuaibun jatun kene tapinibukiaki, na janchadan

⁶Judán enabu Daniel inun, Ananías inun, Misael inun, Azarías ja bedunanbube ⁷dayadu yununika Aspenazin jatu katuxun jawen janchawen jatu kena betsa wakin Daniel kena bena wakin “Beltsasar” waxun Ananías kena bena wakin “Sadrac” waxun Misael kena bena wakin “Mesac” waxun Azarías kena bena wakin “Abed-negó” waxun jatu pima taewaya ⁸xanen ibun piti inun nuxuti vino pepawen chakabui jatun juinti detsiskatsi ikama dayadu yununika Aspenaz Danielin yukakin:

—Uian. Xanen ibujaidatun piti pejaidabia jawen pitiwen yushibubu dami kenwanmisbuwen taexun nukun mekenika Diosun beya chibanma nun sinatamatidubuki, chakabuwakinan. Nun chakabukatsi ikamadan, ¿nuku dabe inun dabebun ja piti piyamakubainxanpa?— aka ⁹dayadu yununika Aspenaz Diosun bedunanbuwen nuimaya ¹⁰Aspenazin Daniel yuikin:

—En xanen ibujaida Nabucodonosordiwun taea en dateaii. Jawada man pikubainxanunbun inun man nuxukubainxanunbun en xanen ibun ea yunushinaki. Bedunan betsabú keskama man imanai babuai en xanen ibun uintan matuwen taexun en xanen ibun ea jatu tenanmatiduki— aka

¹¹jawen jancha ninkatan Daniel inun, Ananías inun, Misael inun, Azarías jau jatu mekekubainun dayadu yununika Aspenaz yunushina Danielin yuikin:

¹²—Nun min tsumabuwen taexun min nuku unanti wanun en mia ea akaii. Yusu jua besti nuku pimakin unpax besti nuku nexumakin ¹⁰xaba besti ja piti jau nuku inankubainunbun jatu yunuwe. ¹³Ja ¹⁰xaba binuaya xanen ibu pimakin jabias piti bedunan betsabudi pimakubainibun nukun besu inun jatun besu uinkin jadatuda besu pepa binua min unantiduwun taexun jaska min shinain keska nuku axanwen— aka

¹⁴dayadu yununikatun Daniel janchai jakidi pe shinantan ¹⁰xaba kaya pitiwen jatu unanti wa ¹⁵ja ¹⁰xaba binukainaya xanen ibun piti bedunan betsabun pikubaini Daniel inun jawen jaibuaibun besu xuai kushipakin jatu binuaya ¹⁶jaskaibun xanen ibun piti nami inun vino ja jatu inanma yusu inun yunu betsa betsapa inun unpax besti jau jatu nexumakubainunbun dayadu yununikatun jatu yunua jaska wakin jatu pimakubainibun

¹⁷ja ⁴bedunanbun Babilonia una kene inun jatun beya dasibi unanti jau tapin keyununbun shinan xabakabi wakin dasibi ninkanika Diosun

jatu wakubainkin tsuada uxamabia nama keska uin inun uxa namakin uin jaska yuinika wakin Diosun Daniel besti unanepa wadiakubainaya ¹⁸jatixun jatu yunuima jatu yusinkin menetan jau ea uinmai bexanunbun, iwanan, xanen ibujaida Nabucodonosorin jatu yunuima bedunanbu dasibi jatu yusinkubaini ma 3 año keyuabun dayadu yununika Aspenazin bedunanbu dasibi jatu iyuxun Nabucodonosor bebun jatu nichian ¹⁹⁻²⁰jabu tibi unanti wakin bestibu tibi Nabucodonosorin jatu yukakubainkin jamapai shadabu Nabucodonosorin jatu unan keyukin Daniel inun, Ananíás inun, Misael inun, Azaríasin bedunan betsabu jatu binujaidaibu unantan jamapai shadabukidi jatu ana yukajaidaya jawaida tapinikakin unanepabun xabakabi kemakin Babilonia anu mukayabu inun yushibu yukanikabu dasibi 10 veces jatu binu keyuabuwun taexun Daniel inun, Ananíás inun, Misael inun, Azarías jatu katua dayaxunkin taewabainabun ²¹Babilonia anu badi ichapa jiwekunkaini Persia nawabu xanen ibujaida Ciron jatu yunu taewabainaya Daniel dayaxundiakunkain ikiaki.

Xanen ibujaida Nabucodonosor uxa namashina jatu yukakin unanti wanikiaki, na janchadan

2 ¹Nabucodonosor xanen ibujaidai ma 2 año kainaitian uxa namakin nama betsa betsapa uinkubainaiwen taea datekin shinanjaidai ana uxatiduma ²jaskawen taea jawen nama betsa betsapa jau jawen mukayabu inun, jaskaxanai bishiwen unanikabu inun, yushin yukanikabu inun, unanepabun jau jawen nama yui benunbun jawen tsumabu yunua buxun jatu ixuntanabu ja bebun dasibi mapuabu ³xanen ibu Nabucodonosorin jatu yuikin:

—En uxa namakin uinshina jawen shinan en tapinpanan jawen datei en bika teneaii— jatu wa

⁴jatun Arameon janchawen unanepabun jatun xanen ibu yuikin:

—Xanen ibuun, ¡jabi min jiweyukunkainxanaii, jawa bextekeamadan! Nun min dayadudan, jadakidi min namashina nuku yuiwe, jaskada jawen shinan nun mia yuikin tapinmaidan— akabu

⁵xanen ibun jatu kemakin yuikin:

—En namashinadan, ma kainkaina en jakimaki. Jakia jaska namakin en uinshina jakidi man ea yuikin unanmama matun yuda mexte mexte akin matu chudi waxankanikiki. Ja inun, matun jiwe tibi bedantan janus maspu waxankanikiki. ⁶Jakia namakin jawada en uinshina inun jaska en namakidi jawen pe shinanmati xabakabi man ea yuiayadan, matu kenjaidawakin matu medabejaidawakin jamapai shadabu mabu en matu inankuinxanaii. Jaskawen taexun namakin jawada en uinshina unantan jakidi ea yuikanwen— jatu wa

⁷ja kachu unanepabu betsan kemakin yuikin:

—En xanen ibuun, jaska min namashina nuku yuiwe, min nuku yuia jaska min namakin uinshina jaska ixanai xabakabi nun mia yuiaidan— akabu

⁸xanenibun ana kemakin jatu yuikin:

—En manakuti man ninkaxuwen taexun ea manamayukin man ea nemayukatsis ikaii. Man ea jaska watidudan, en unaiin. ⁹Jabiaskabiaken en namashina man ea yuiamadan, jabias en kupitiwen man nuitapaxanaii. En shinan betsa ea wamakatsis ikin unanumas chani jancha ea yuinun— iwanan —yuinamekin jabias man shinaiin. Jaska en namashina besti ea yuitan, januxun ja nama en uinshina jaska ixanai man ea tapinma ninkatan en unanxanaii— jatu wa

¹⁰unanepabun ana kemakin yuikin:

—Jawada min unankatsis ikai mai jidabi anuxun tsuan jaskatan jaskakidi mia yuitidumajaidaki. Ja dikabi xanen ibu betsabu kushipabiakin na min yuka ikai keska juni mukayabu inun, yushibu yukanikabu inun, juni unanepabu jaska jatu yukai janchaisbumaki. ¹¹Xanen ibuun, jawada min yuka ikaidan, bikajaidaki. Tsuan mia yuitidu jayamajaidaki, yushibubun besti atidubudan. Jakia jabudan, yudabube jiweabumaki— akabu

¹²jaska waibu jatun jancha ninkatan sinatajaidakin Babilonia anu unanepabu dasibi jau jatu tenanunbun xanen ibujaida Nabucodonosorin jatu yunua ¹³jaska jatu banabimakin keyutan Daniel inun jawen jaibuaibudi jatube tenanun ixun jatu benabaunaibun

Xanen ibujaida namakin uinshina Danielin yuikin unanmanikiaki, na janchadan

¹⁴unanepabu tenanun ika xanen ibujaida mekenikabu yununika jawen kena Ariocin Daniel bechixun achia daewakin unanxubida jancha bexuniwen jancha wakin ¹⁵Danielin yukakin:

—¿Jaskakin nukun xanen ibujaidatun jatu tenankanwen, iwanan, jawaida matu yunuxumen?— aka jaskawen taexun jatu akai Ariocin Daniel xabakabi yuikin ninkama ¹⁶jabe janchakatsis ikaya Nabucodonosor anu Ariocin Daniel iyua jikikain Danielin yuikin:

—Xanen ibujaidatuun, ea ninkayuwe. Jaska min namashina tapintan en mia yuitiduki. Xaba bestichai ea jeneyuwe— aka jaska wa xanen ibujaidatun ninkatan:

—Peki— aka ¹⁷⁻¹⁸janua kainkaini jawen jiwe anu kai jikixun Babilonia anua unanepa betsabube jau nuku tenanyamanunbun, iwanan, jawen jaibuaibu Ananías inun, Misael inun, Azarías Danielin jatu yuia: “Jau nuku Diosun medabewanun Dios nai anua yukanankanwen”, jatu wa ¹⁹jabias meshu medan uinmakin xanenibun nama inun jaska ixanai yuiti Diosun Daniel unanmakin keyuken jaskawen taexun nai anua Dios kenwankin ²⁰na eska janchawen Danielin yuikin:

“Diosdan, unanepa inun kushipa jawena jayaki.
 Jaskawen taexun Diosun kena ikibi ika yuikin
 jau kenwankubainxanunbunwen, jawa jeneamadan.

21 Janu badi tibi uitian inun badiantian ja taxnimamistunan,
 Diosun besti atiduki.

Jaska wamisxun xanen ibu betsa putakin nichintan
 jawen xantukun xanen ibu betsabu tsauntiduki.
 Unanepabu unanmamiski.

Tsuada tapinika jawaida tapinmamiski.

22 Jawada tapian bika juinti uke medan inun jawada junea unanmakin
 keyumiski.

Jamapai meshu medanua unan keyuikiki.

Xabadan, jabria jabe ketaxameaki.

23 Min ea unanepa wakin kushipa waniwen taexun
 en xenipabun mekenika Dios min miadan,

mia duawakin, benimawakin en mia kenwaiin.

Jaska natian nun mia yukaxu ikis min ea tapinmaxuki,

jawada xanenibun shinankin bika teneaikidi nuku unanmakinan”,
 atan

24 Dios kenwankin keyutan jaska Babilonia anua unanepabu dasibi
 tenankanwen, akin xanen ibujaidatun Arioc yunushina anu ana uin
 kaxun Danielin Arioc yuikin:

—Unanepabu nuku jatu tenanmayamawe. Jaska namashina inun jaska
 ixanai xabakabi en yuitiduki. Xanen ibujaida bebun ea iyuwe— aka

25 jaska wa xanen ibujaida Nabucodonosor anu Daniel iyuxun ja bebun
 nichinxun yuikin:

—Xanen ibuun, Judán enabu min jatu iweni anua na juni bechixun
 en mia iwexunaii. Min namashina inun jaska ixanai jatun mia
 unanmaikiaki— aka

26 januxun xanen ibujaidatun Daniel jawen kena betsa Beltsasar
 yukakin:

—¿Jaska en namashina inun jaska ixanai min ea yuitidumen?— aka

27 Danielin kemakin yuikin:

—Xanen ibuun, jawada min unankatsis ikai unanepabu inun, yushin
 yukamisbu inun, mukayabu inun, bebunkidi jaskaxanai bishiwen
 unanikabu tsuan jaska mia yuitidubumajaidaki. 28 Jabiaskabiaken Dios
 bestichai nai anu jiweatun jawada junea unanmamiski. Jaskanunbadi
 min xanen ibujaidaken mia unanmashinaki. Min uxa namakin jawada
 min uinshina en mia unanmai. 29 Min dakati anu dakaxun min jaska
 wakatsis ikaikidi min shinankin taewayawada junea unanmamistun
 min namaiwen mia uinmashinaki. 30 Ja dikabi na jabias min nama junea

eadi ea uinmadiashinaki. Jaska ea unanepakin yuda betsabu en binukin taewama jakia min namakin uinshina jaska ixanai en mia unanmanun Diosun ea unanmashinaki. Min jaska shinain mia anu juxun mia uinmashina en mia jaska tapinmatiduki.

³¹Xanen ibuun, min uxa namayadan, mia bebun ja dami juni itsa ewapa keyatapa chaxajaida mese pakea tibi benia nia min uinshinaki. ³²Ja dampian buxkadan, mane oro jas pepaki. Jawen xuchi inun jawen punyanan, mane plata jas pepaki. Jawen puku nashtu inun jawen kishidan, mane bronce kushipaki. ³³Jawen bikedanan, mane hierro due keska kushipaki. Jawen taedan, mane hierro kushipa inun mapu bawa kushipa jusiaki. ³⁴Min xanenibun jaska uianyan mati keyatapa anua mishki ewapa bestichai tsuan jawa mekin xutuamabia jamebi tsekei mati anua tadamekidankin jawen tae tu akin chakantushia ja dami tin iki tudeke tudeke ikaya ³⁵jawaida mane hierro inun, mapu bawa inun, mane bronce inun, mane plata inun, mane oro ibubis tudeke tudeke iki mishpui keyushinaki, baditian xekiwan trigo tsekatan manaundixun kata kata aka niwen jawen xaka sa abainkin chai bua jawa jawen xaka betsa dakama keskaidan. Jakia mishkipan ja dami tu aka di iki mishpuaya janubi ja mishki jawen xantukun ewakauani mati itamamatan dasibi mai jidabi achi keyushinaki. Jaska min namashinaki, ja jaskadan.

³⁶Uxa namakin min uinshinaki. Jaska kainxanai min unankin tapinun en mia yuiiai. ³⁷Dami buxka min uinshinadan, jabia min miaki. Jau xanen ibu betsa betsapabun mia kenwankubainxanunbun mia kushipa wakin Dios nai anuatun mia xanen ibujaida waimawen taea xanen ibubu betsabu yunukin dasibi jatu binukubaini min xanen ibu ewapakunkainaii, ³⁸janida yudabu inun yuinaka inun nai anua peiyabu jiwemisbu dasibi Diosun mia ibu wamaimaxun min buxkadan, ja dami oro buxka keska mia uinmashinaki. ³⁹Min xanen ibukunkaini keyui mawaken pe bexmas xanen ibu betsa mina keskama ixanikiki. Ja xanen ibu mawadiaken jawen xantukun xanen ibu betsa mane bronce keskatun mai jidabi yunukubainxanikiki. ⁴⁰Ja xanen ibu mawadiaken mane hierro kushipa keska xanen ibujaida betsa juxanikiki. Mane hierro jawen mastati ewapa keskatun tude tude akin dasibi xanen ibu betsabu chakabuwaxanikiki, jatu binukinan. ⁴¹Xanen ibuun, ja dami tae dabe inun jawen meken texpa tibi mapu bawa tude inun mane hierro tude jusia keska yuiadan, xanen ibu bestichaimatun yunukubainaibu yununikabu wakin paxkatan mane hierro keska kushipa bexmastun yunukubainxanikiki, jaska min uinshinadan. ⁴²Jawen tae inun jawen meken texpa shadabu mane hierro inun mapu bawa jaya jusia keskadan, ja jaska yuiadan, jabiatandi xanen ibu kushipa inun babu ikubainxankanikiki. ⁴³Mane hierro inun mapu bawa jusia min uinshina keska jatun ainbu bake bitan jabe xanen ibube yubakabia ja xanen ibu kushipa ikatsi ibiakin yununika betsabu

daewakubaintidubumawen taea jaska jatuki dasiama ixankanikiki, mane hierro inun mapu jusitiduma keskaidan. ⁴⁴Ja xanen ibubun yunukubainaibutian xanen ibubu betsabu keskama nai anu jiwea Diosun xanen ibu betsa katukin yununika kayabi waken tsuan jawen xanen ibu maema taskama ikunkainxanikiki. Xanen ibu betsabun kushipa keyuaya na yununika kayabi niti ikama xanen ibupakexanikiki. ⁴⁵Ja jaska mishkidi yuiadan, min uianyan mati keyatapa anua mishki ewapa bestichai tsuan mexte mexte akama ibubis tsekekidani mati anua tadamekidankin mane hierro inun, mane bronce inun, mapu bawa inun, mane plata inun, mane oro jaki tin ikin dasibi mishpu wakin keyua keskaxanai min xanen ibujaida Dios kushipajaidatun mia unankin mia uinmashinaki, jaska taxninunbadaidan. Min namashina chanimajaidaki. Ja inun, en mia ninkamakin yuiadan, chanimadiki— aka

⁴⁶jaska wa ninkatan Daniel bebun xanen ibujaida Nabucodonsor danti iki maiki beti itan januxun inankuin inantan xeni ininti jau kuaxununbun jawen tsumabu yunua jaska yunua akin keyuaibun ⁴⁷Nabucodonsorin Daniel yuikin:

—Na nama junea tsuan atiduma en mia jawa unanmakin yuiamabia min ea tapinmaxunwen taea chanimajaida matun mekenika Dios kushipakunkainkin yushibubu dasibi binujaidaikiki. Xanen ibubu dasibibun xanen ibudiki, jawada junea jancha unanmamsidan— atan

⁴⁸januxun jatu binumakin keyukin jau Daniel kenwankubainxanunbun mabu inankuin jawendua ichapa inantan maewan Babilonia mai pakekauana yununika waxun jabetan unanikabu jatun xanen ibu waxun jawen dayadubu dasibi xanen ibujaida Nabucodonsorin Daniel jatu binumashinken ⁴⁹jawen jaibuaibu shinankin Danielin xanen ibujaida jawen jaibuaibu jatu yukaxuna maewan Babilonia mai pakekauana anu jabudi xanen ibu wamaima januxun jatu mekekin jau jatu yunukubainxanunbun Sadrac inun, Mesac inun, Abed-negó xanen ibujaidatun jatu yunua janu jawen jaibuaibu dayakubainaibun xanen ibun jiwe ewapa jawendua anu xanen ibujaida medabewamisbube Daniel jadi tsaua dayakunkainikiaki.

Mane oro dami kenwanibukiaki, na janchadan

3 ¹Januxun jatun xanen ibujaida inun jawen mekenika yushibubukidi dasibibu jatu shinanmati dami wakin jawen keyatapa 30 metro inun jawen jaxpa 3 metro mane oro dami watan jau Babilonia mai pakekauana mapanpa jawen kena Dura anu jau nichinxanunbun xanen ibujaida Nabucodonsorin jatu yunua mane dami pewanikabun ninkatan jaska jatu yunua akubainkin ma keyuxunabu ²mai pakea ewapa xanen ibubu tibi inun, detenamenikabun xanen ibubu tibi inun, mai pakea ewapa jatiuma provincia xanen ibubu tibi inun, jatu medabewakin jatu yusin

pewamisbu tibi inun, xanen ibun pei mekenikabu tibi inun, unanepabu mekenanbu tibi inun, jamapai shadabu xanen ibu bexmas tibibun ja dami jatu amaima kenwankin jau xabakabi wai benunbun Nabucodonosorin jawen tsumabu yunua jatu yuitanshinabu ³dasibi jatu kenashina ja xanen ibubu beake beakeshina kenwain besinun ika ja dami bebun ma ichai keyuabun ⁴besi taekin jatu banabimati juni betsan jui kushipawen jatu yuikin: “Yudabu xukuabu tibi anua inun jancha betsa betsapawen janchamisbu tibi anua junibu tibibuun, pesxun ea ninkakanwen.

⁵Trompeta inun, tepedewe inun, cítara inun, lira inun, salterio inun, gaita inun, mimawati tibi mawaibu ninkatan danti iki beutan mane oro xanen ibujaida Nabucodonosorin jatu dami wamashina kenwankanwen. ⁶Jamen tsuabuda ja dami kenwain man danti iki beutan kenwanbumaken jabudan, jawaida chi jede ji ikai anu matu udenkanikiki. Uindakanwen”, jatu wa

⁷Janu ichai keyuabun ja mimawati mawaibun ninkai danti iki beutan mane oro dami kenwankin keyuaibun

⁸Caldea nawabu Judíobuki sinatamis betsa ma janu jatu pewaxuna jaska shinain jatu chitekatsi xanen ibujaida Nabucodonosor bebun mapuxun ⁹yuikin:

—Xanen ibuun, ¡jabi min jiweyukunkainxanaii, jawa bextekeamadan! ¡Min kena jau shinankubainxanunbunwen! ¹⁰Mimawati mawaibu dasibibun ninkatan danti iki beutan mane oro dami jawaida jau kenwanunbun min ma jatu yunuxuki. ¹¹Tsuabuda ikabumaken chi jede ji ikai anu jau jatu udenunbun min janchadiaxuki. ¹²Jakia Judíobu betsabu Babilonia mai pakekauana mekekin jau jatu mia yunuxunkubainxanunbun min jatu yunuima Sadrac inun, Mesac inun, Abed-negó jabun mikidi pe shinanbuma min mekenika yushibubu kenwanbuma mane oro dami min jatu nichinmashina jabun jawa kenwanbuma nun uiaiin— akabu

¹³jaska yuiabu ninkai sinatajaidakin Sadrac inun, Mesac inun, Abed-negó jau iwenunbun Nabucodonosorin jatu yunua jatu itanxun xanen ibu bebun jatu nichianbu ¹⁴xanen ibujaidatun jatu yukakin:

—En mekenika yushibubu inun mane oro dami en jatu yunua ashianbu man kenwanma ixudan, ¿chanimamen? ¹⁵Mimawati mawaibu ninkakin jawaida mane oro dami en jatu amashina bebun danti iki beutan ¿man kenwantidumen, ikisdan? Jakia man kenwanmaken na jabiatian chi jede ji ikai anu matu udenkanikiki. ¿Jaska matu waibun jadatuda yushinen matu mekekin piskumatidumen?— jatu wa

¹⁶Sadrac inun, Mesac inun, Abed-negón kemakin yuikin:

—Ja dami kenwantikidi nun mibe jaska jancha jayamaki. ¹⁷Chi jede ji ikai inun dasibi min nukun xanen ibun nuku chakabuwakatsis ikai nukun Mekenika Dios nun kenwanmistun nemakin nuku binumatiduki.

¹⁸Jakia nuku medabewamabia xanen ibuun, mianan, uindajaidawe. Min yushibubu nun kenwanma inun mane oro dami bebun jawa danti ixun nun kenwanmadiki— akaibuwen taea

**Chi jede ji ikai anua Diosun jatu medabewa jawa
menuama inibukiaki, na janchadan**

¹⁹Jaska jancha wakin yuiabu Nabucodonsorin ninkatan jatuki sinata chakayamai jawen besu tashipe iki keyutan mai kini kedu anu chi kuabu jede ji ji ikai anu udenmisbu anu jatun beya binumakin ana 7ki kadu ichapa napukin jau keti wakin ji a chakayamanunbun jatu yunua keti wabu dekein keyua mesea daka ji ji ikai anu ²⁰Sadrac inun, Mesac inun, Abed-negó tapu manaundixun chi anu jau jatu putanunbun jawen detenamenikabu kushipa datebuma jatu yunua ²¹jatun daya tadi jawendua saweabu ja dabe inun besti juni jatun meken inun jatun tae neaxun manaundixun chi dekenjaida anu jatu putabu ²²jaska xanen ibujaidatun jatu yunuai bebis jawaida akin chi dekenjaida anu detenamenikabun jatu putaibu jede bubikin jatu besti menukin tenanyan ²³jakia mai kini anu Sadrac inun, Mesac inun, Abed-negó neaxun putabu kauani chi dekenjaida anu tin ikaibun

²⁴jatu jaska waibu uinun ika jawaida Nabucodonsor benikain e ikin jawen unanepabun medabewamisbu yukakin:

—¿Juni dabe inun besti neaxun chi anu putakanxumen?— jatu wa jabun kemakin yuikin:

—Jaa. Jaska wakanxuki— akabu

²⁵xanen ibun ana jatu yuikin:

—Jaska wabiakanxuken ean uinkinan, juni dabe inun dabe neakama chi anu mapubaunaibu jawa menui chakabuama en uiain. Ja betsadan, tsuan ja chi anu udeanma yushibun juni bake itsaki— ikin

²⁶janchakin yuikubaini kai, janu kadu kuamisbu kini kexa anu kemaxun jui kushipawen jatu kenakin:

—Sadrac inun, Mesac inun, Abed-negó Dios dasibi binuatun tsumabuun, taxnibidani nenu eanu bekanwen— jatu wa, chi jede anua ja dabe inun besti mapekei kainbidanaibun ²⁷xanen ibujaidatun medabewanikabu inun jawen xanen ibubu bexmasbun jatu uinun ika bei ja dabe inun besti anu icha mapuxun jatun yuda jawa chin jatu metsama inun, jatun bu jawa jatu siwakama inun, jatun tadi jawa menuama ixu uinkin jawa itsa maii xeteabumaken

²⁸jabiatiandi jawaida Nabucodonsorin jatu yuikin:

—Sadrac inun, Mesac inun, Abed-negó jatun mekenika yushin Dios dasibibun ¡jau kenwankubainxanunbunwen! Jabu mawaki dateama jatun mekenika Dios ikonwain jawada yushin betsa bebun danti ixun kenwainsbuma inun ea en xanen ibun yunuti jancha jawa akabumawen

taexun chiwen nun jatu kupiaya jatun mekenika Diosun jawen nai tsuma yunukin jawen dayadubu chanima chi nemaxunkin jatu medabewaxuki. ²⁹Natian jaska jatu medabewaxu keska yushin betsan jaska watidumawen taexun ean eskakidi en yunuaii. Yudabu inun xukuabu betsa betsapa inun jancha betsa betsapa jawen janchamisbu anuxun Sadrac inun, Mesac inun, Abed-negó jatun mekenika Dioskidi jancha chakabu tsuanda danain xanen ibubun jawen yuda bais axun mextedabetan jau jatun jiwedi tekekin janus manchinkubainxanunbunwen— jatu watan

³⁰chipu Babilonia mai pakekauana anu xanen ibun ja dabe inun besti daya betsa kushipajaida ana jatu inankin yununikiaki.

Nabucodonosor jawen shinan benuima jiweyunikiaki, na janchadan

4 ¹Badi betsatian dasibibun jau tapinxanunbun Nabucodonosorin jatu banabimakin yuikin: “Yudabu dasibi inun xukuabu betsa betsapa tibi inun, jancha betsa betsapawen janchamisbu mai jidabi anu jiwebaunabu jawa nuitapama unanuma man jiwekubainxanunbun ea en xanen ibujaida Nabucodonosorin matukidi en shinaiin. ²⁻³Dios pepa dasibi binuatun jaska betsan atiduma dami itimaska akin jawen kushipawen ea amamis man uintidubuki. Yudabu jiwei jawenabu pa chakayamai jatu yunui xanen ibukunkainxanikiki, jawa bextekei jeneamadan. Jaska dami itimaska betsa betsapa ea axunkubaini en matu yuikatsis ikai ea ninkakanwen.

⁴Ea en Nabucodonosor en jiwe ewapa jawenduajaida anu unanuma jiwekunkaini enabube piti inun mabu pepa en jayawen taea benimakunkaini ⁵jakia meshu betsatian en dakati anu daka en uxa namaya ja en bika teneaitun mesejaida en namapan ea uinma en datejaidaniki. ⁶Janua en nama unanxun jau jaska jawen shinan ea yuinunbun Babilonia anua unanepabun dasibi jau ea yui benunbun en jatu yunua buxun jatu ea iyuxunabu ⁷Babilonia anua mukayabu inun, yushibubu yukamisbu inun, unanepabu inun, bishiwen unanmisbu dasibi bei ea bebun mapuabu jaska en namakidi en jatu yuia jakia jaska jadidi yuiti unanbumaken ⁸atimas eanu Daniel jua, jawen kena betsa Beltsasar en mekenika yushin dios keskadan, ja medan jabun mekenika medibi yushin jiwexun unanmakubainmis jabun mekenika medibi yushinen unanmakubainmis jaya ea ninkaya eska en nama en yuiniki: ⁹Yushibubu yukamisbu xanen ibu Beltsasariin, Dios medibi yushinen mia unanmakubainmiswen taexun dasibi tsuan unantidubuma min unan keyuiai, ean en unanan. Jaska en nama en uinshina en mia yuia ninkatan jaska jadidi yuiti ea yuiwe. ¹⁰Dakaxun namakin eska en uinshina ea yuiniki:

Mai jidabi namakis ji keyatapajaida en uinshinaki.

11 Ja dukun yumei jawen yuda ewapakunkaini keyatapajaidai
jawen masua nai kuin binua
mai jidabi chajaida anuxun dasibibun uinbauntidubuki.

12 Jawen pei jawendua inun
jawen bimi midimajaida dasibi yudabu inun
yuinakabun pibiabu texetiduki.
Jawen pei naman yuinaka utatidubu inun
jawen mebi tibi anu isapan na wakubaini
ja jiwen dasibibu jiwekubainaibun
ja ji jaskadaya jaskadatidubuki.

13 Jakia namakin en uinkubainaya nai tsuman uinkin mekenika nai
anua butuxun 14 jui kushipawen yuikin:

Ja ji dedaxun jawen mebi mexte mexte atan
jawen pei sidikin keyutan jawen bimi tsekakin keyuxun sa akanwen,
janu yuinaka utamisbu inun isapan na wamisbu jau taxni
paxanunbunwen.

15 Jakia ja mai anu jawen budu inun jawen tapun jenekanwen.
Mane hierro inun mane bronce dispi chiwetameyawen
jawen buduki nexaxun bai anu basi mapu anu jenekanwen.
Penaya tibi basnunman cha akubaina
yuinakabubetan basi pikubainxanikiki.

16 Jawen juni kuinen shinan bepukin betsa watan
yuinakapan shinan keska wa,
na jaska jawen kupiti chakabuwen
7 año jiweyukunkainxanikiki, iwanan,

17 Dios kushipajaida dasibi jatu binuatun
yudabu tsumaxun tsuada xanen ibubu wakatsi ikin ibubis
katutiduki,
yuda xukua betsa anu juni jawauma
jatu xanen ibu wamiski,
jatu yunukubainti wakinan.
Na kupiti jiweabu dasibibun
jau tapinxanunbun jawen nai tsuma medibibu yununiwen taexun
ja nai tsuma uinikatun mekenikabun
nun mia ma banabimaii,
ea wa en ninkashinaki.

18 Na eska namakin en ea xanen ibujaida Nabucodonosorin en
uinshinaki. Janida en jatu yunumis anu unanepabu jiweabun jaska
jadidi unanbumajaidaki. Jakia Dios medibitun yushin kushipa min

jayawen taexun na nama jawen unanmati mian min unaiin', jaska ikis ea yuidiwe", en wa

¹⁹Janua Daniel jawen kena betsa Beltsasar jaska yuiai ninkatan jawaida jawen shinan medan chakabu shinain pes nia datejaidai mesei jawa janchakatsis ikamaken jakia ea en xanen ibujaidatun yuikin: "Beltsasariin, jaska en namashina inun jaska jakidi min ea yui keyutiduwen dateyamawe. Jaska min shinain ea yuiwe", en wa Beltsasarin ea kemakin yuikin: "En xanen ibuun, min nama pemajaida min uinshina min ea yuimakatsis ikaidan, jaska min namashina ikidan, jau miki sinataibu ixanunbunwen", itan ²⁰"Ja ji min uinshina ewai ewapai keyatapai nai kuin binua mai jidabi chajaida anuxun dasibibun uinbauntidubu ²¹inun jawen pei jawendua inun jawen bimi midimajaida dasibibun pibauntidubu janu yuinaka utamisbu inun jawen mebi tibi anu isapan na wamisbudan, ²²jaskadan, xanen ibuun, ja ji keskadan, jabia min miaki, ewai min ma kushipajaidaidan. Jatu detekubainkin jatun mae tibi achikubainkin nai kuin min binua keskaki. Janida mai jidabi anu min jatu yunumisdan, jaki. ²³Ja inun, min uianyan nai tsuman uinkin mekenika nai anua butuxun yuikin: 'Ja ji dedakin di axun chakabuwakin keyukanwen. Jakia ja mai anu jawen budu inun jawen tapun jenekanwen. Mane hierro inun mane bronce dispi chiwetameyawen jawen buduki nexatan basi bai anu jenekanwen, penaya tibi basnunman cha akubaina yuinakabubetan 7 año basi pikubainxanai jaska yuiadan. ²⁴Na jaska keska min ikunkainxanai keska wakin mia pewakatsi ikin Dios kushipa dasibi jatu binuatun na kupitiwen mia akatsi ma mia yunuaki. ²⁵Min xanen ibubiaken chai tadi yudabu paxkatan min jiwenun mia nichianbu inabube jiwexun ina awa keskakin basi min pikubainxanai, basnunman min yuda cha akubainadan. Dios kushipajaida dasibi jatu binua yudabun xanen ibu jatun tsuada xanen ibu wakatsis ikin jatu bechipaikin katumis min tapindiama yuinaka keskai 7 año jiwekunkainkin atimas tapintan min unanxanai. ²⁶Jawen budu inun jawen tapun mai anu jau jenenunbun jatu yunuaya Dios besti kushipa kayabi jaya unantan chintunkidan min ana xanen ibujaida ikunkainxanai', jaska Dios kushipakidi unainan. ²⁷Jaskawen taexun xanen ibuun, en jancha min ea chibantidumenkain, ea ninkawe. Ana ninkaismama pepas akubainwen. Min chakabu jenekubaini nuitapaibuwen nuikunkainxanwen. Jaska wakubaini unanuma jiwei min mabuyapakexanimenkain, mia kupiamadan", anikiaki.

²⁸Xanen ibujaida Nabucodonosor Danielin banabimaima keska akin jabias Diosun kupikubainikiaki, jawa kaneamadan. ²⁹Janua año bestichai kaya Babilonia anu jawen jiwe jawendua keyatapajaida masapa anu nikaunkin uinbauni ibubis kenkin jawen medabewanikabu Nabucodonosorin ³⁰jatu yuikin: "Babilonia mae ewapajaida jawendua

uinkanwen. En maewan uinkin en kushipa jau shinankubainxanunbun xanen ibukin nenuxun en jatu yunukubainun, iwanan, na maewan jawendua en kushipawen en jatu amakubainimaki”, jatu wai

³¹Janchai jenediamaken nai anua jancha taxnikin yuikin: “Xanen ibu Nabucodonosoriin, eskaki, ninkawe. Min xanen ibumisdan, ana minamaki. ³²Tadi min benanta jiwenu minabun mia nichinxankanikiki. Inabube jiwexun ina awa keskakin basi min pikubainxanaii. Dios kushipajaida dasibi jatu binuatun yudabu xukuabu tibi manibaunabu yunukin tsuabuda xanen ibu wakatsi ikin ibubis katutidu min tapindiana yuinaka keska 7 año jiwekunkainkin atimas tapintan min unanxanaii”, akaya

³³Jawaida jaska yuima keska jawen kupiti banabimaima taekainkin jawen shinan yuinakapan shinan keska wawen taexun jawenabun Nabucodonosor putakin nichianbu ina awa keskakin basi pikubaini basnunman jawen yuda cha akubaina, jawen bu inun jawen mentsis ewai chajaidai tete pei inun jawen juntsis keskanikiaki.

**Atimas Dios kayabi Nabucodonosorin ninkatan chanima
ikunwankin taewabainikiaki, na janchadan**

³⁴Nabucodonosorin ana yuikin: “Diosun ea kupini janu ea menekin dasibi ea betsa waya ea Nabucodonosor naiudi teskantan en uianyan en shinan pepa ana eki jikimakin kaya waya Dios kushipa jatu binu keyua jiwei ikibi ika ean duawakin kenwankin yuikin:

‘Yudabu jiwea pakubainaibu
Dios xanen ibukunkainkin
jawen kushipawen jatu yunukubainxanikiki,
jawa bextekei jeneamadan.

³⁵Ja bebun mai jidabi anu jiwebaunabu jawaubumaki,
jawa kushipa jayabumadan.
Nai anu inun mai anu jawen shinanen jaska shinain besti aki
jiwemiski.
Tsuanda jawen kushipa nemakin yuikin:
¿Min jaska wai ikai? akin tsuan yukatidumaki’ ”, itan,

³⁶“Jabiatiandi en shinan pepa ana eki jiki keyuaya enabu ewen benimai ana eki dasixun dasibibun jau ea pe shinankubainxanunbun en jancha ninkakin ikunwainbuwen taea xanen ibujaidai en ana taekainimaki. En yusinan medabenanikabu inun en xanen ibu bexmasbun ea benai bexun enabu Caldea nawabu dasibi en ana jatu yunukubainxanun ea ana ninkakin taewabainimabuki, ja dukun en kushipani keskama ana kushipa binuawen yunukubainidan.

³⁷Ibubis kenkubainaibu jatu nese wakin pepa wamis inun chanima akubainmiswen taexun nai anu xanen ibu Dios duawakin jawen jancha ninkakin ea en Nabucodonosorin pepawakin xabakabi en kenwankubainaii”, jatu wani unanuma jiwekunkaini mawanikiaki.

**Xanen ibujaida Belsarin jatu pimakin jatu
besimanikiaki, na janchadan**

5 ¹Badi ichapa ma kaya Babilonia xanen ibujaida betsa Belsarin jatu pimakin jatu besimanun, iwanan, 1,000 jawenabu yununika xanen ibu bu xukua tibi anua jau benunbun jatu yunua bukubaunkin jatu yuikubauntanshinabu dasibi ma bei keyushinxun xanen ibu jatubetan pikin uva vino ichapa akubainkin ²⁻³xanen ibujaida ma paean benimakin Jerusalén Templo anua mane oro inun mane plata kencha ichapa jawen juchi Nabucodonosorin jatu bemani jau bitanxun jaki vino jatu amabaununbun Belsarin jawen dayadubu yunua buxun kencha dasibi ichawatanxun xanen ibujaida inun, jawen ainbuaibu inun, jawen nantakea ainbuaibu inun, dasibi jabetan piaibun Jerusalén Templo anua kencha benibuwen vino aki ⁴paenxun jatun yushibu oro inun, plata inun, bronze inun, hierro inun, ji inun, nenkati dami wanibu kenwainbun ⁵jabiatiandi junin meken besti taxnixun kene pechiudi bin dekuabu tsaua xabakan dintu kene juxupa anu kenekin taewaya ja meken besti xanen ibujaida Belsarin uin ⁶datei besu juxujaidatan jawen yuda jidabi saki saki ikin ⁷bis bis ikin Babilonia anu yushin yukamisbu inun, unanepabu inun, bishiwen unanmisbu jatu kena beabu kene metukin jatu yuikin:

—Ja kene tsuanda yuikin unantan jadidi jancha yuia man ea tapinmadan, xanen ibun tadi tashi jushinipa sawemaxun oro mane teumatan xanen ibui ea kachu tsaumis anu ja dabe inun besti xantukun yunui tsaumisbu anu en tsaunxanaii— jatu wa

⁸unanepabu xanen ibu dayaxunmisbun dasibi jikibidan jakia ja dintu kene juxupa anu jawada kenea unantan jadidi yuibainti tsuan xanen ibu tapinmatidubumawen ⁹taea xanen ibujaida Belsasar ana datejaidai jawen besu juxui keyuken jawen yununikabun uin jawawen jaska watima ikaibun ¹⁰xanen ibujaida inun jabetan piaibu bibiski ikaibun xanen ibun ewan ninkatan jikikidan yuikin:

—Xanen ibuun, jjabu min jiweyukunkainxanaii, jawa bextekeamadan! Jaskaida jawen datei besu juxua dakayamawe. ¹¹Janu min yunu keyumis anu juni betsa Dios medibitun yushinen unanmakubainmis min juni jayaki. Min juchi jiwea xanen ibuitian yushibubu keska jawen shinan jawa junema xabakabi inun tapinika inun unanepakin ja junin jatu unanxunkubainiki. Jaskawen taexun nukunabu mukayabu inun, yushin yukamisbu inun, unanepabu inun, bishiwen unanmisbu jatu mekei jau

xanen ibukunkainxanun min juchi xanen ibujaida Nabucodonosorin ja juni katuniki, ¹²jawen kena Danielbiaken kena betsa wakin Beltsasar wanidan. Jawada namabu jakidi unantidu inun, junea jancha jatu unanmakin yusintidu inun, jawada itimaskabiaken pewatidu shinan xabakabi jawaida tapinkin unanmamis yushin jaya ikunkainiki. Daniel menan kenadiwe. Ja juxun ja dintu kene juxupa anu jawada kene nea jaska yuitikidi mia unanmaxanikiki— aka

¹³jawen ewan jancha ninkatan jau Daniel iwexununbun Belsasarin jatu yunua Daniel iwexunabu xanen ibujaida bebun nia Belsasarin yukakin:

—Judán enabu achitan Jerusalén anua en juchi Nabucodonosorin jatube mia iwenidan, ¿min jabiamen, Daniieldan? ¹⁴Mikidi ea yuikinan, Diosun Yushin kushipa min jaya min shinan xabakabijaida inun, jawaida tapinika inun, min unanepakiaki. ¹⁵Eskawen taexun en xanen ibuai anua enabu juni unanepajaidabu en jatu kena bexun na kene unankin betsan ea jawa yuiamajaida ikanxuki, ja jancha unankin tapianmadan. ¹⁶Jabiaskabiaken junea jancha jatu unanmakin jawada itimaskabiaken min pewatidu mikidi yuiaibu en ninkaxuki. Ja dintu kene juxupaki kene nea yuikin unantan jadidi yuitikidi min ea yuikin unanmaya xanen ibun tadi tashi jushinipa sawemakin oro teuti sawematan dabe inun besti xanen ibun yunui tsaumis anu ebe en mia tsaunkin xanen ibu waxanaii— aka

¹⁷januxun Danielin kemakin yuikin:

—Xanen ibuun, min ea jaska inankuin yuiaidan, juni betsa inantan axanwen, min jiwe pepa anu xanen ibumakinan. Jakia eanan, ja dintu kene juxupa anu kene nea unantan jadidi yuia en mia unanmai.

¹⁸En mia yuixunai ea ninkawe. Jawen jancha ninkakin dasibibun jau jawen kena unankubainxanunbun min juchi Nabucodonosor kushipa wakin Dios kushipa dasibi jatu binuatun xanen ibujaida wanixun duawakubainiki. ¹⁹Jawen kushipa Diosun ma inaniwen taea yudabu xukuabu tibi inun jancha betsa betsapawen janchamisbu min juchi bebunua datei saki saki ipaunibuki. Tsuabuda tenankatsi ikin tenankubainiki. Tsuabuda jau jiweyununbun min juchin jatu jenekubainiki. Betsa betsapa xanen ibu wakubainkin betsa betsapa jatu nuitapa wakin jatu babu wakubainiki. ²⁰Jakia ibubis kein: “Ea besti pe xanen ibu en kushipajaidakunkainaii”, iki juinti kushitan keainwen taexun jawen xanen ibun kushipa inun jawen pepa dasibi Diosun mebian ²¹jau tadi jiweyukunkainxanun nichianbu dami betsai yuinaka keskai asno inamabe jiwexun ina awa keskakin basi pikubaini basnunman jawen yuda cha akubaina Dios kushipajaida dasibi jatu binuatun yudabun xanen ibu jatun tsuada xanen ibu wakatsis ikin jatu bechipaikin katumis tapindiana yuinaka keskai jiwekunkainkin atimas min juchin tapinkin unaniki. ²²Xanen ibujaida Belsasariin, min jawen baban min juchi

jaskani unanbiai ibubis miadi kein min pe jiweamaki. ²³ Jakia nai anua Jehováki kaxekin jawen Templo anua jawen kenwanti kenchá ichapa jau bitanunbun min jatu yunua bitanxun ja besiaibubetan Jehová kenchawen uva vino akubainkin matun dami yushin oro inun, plata inun, bronce inun, hierro inun, ji inun, nenkati dami ichapa wanibu jabun jawa uianbuma inun, jawa ninkabuma inun, jawa unanbumajaida min jatu kenwanmaxuki. Jakia betsadan, Diosun besti mia jiwemakubainkin dasibi min jiwea mia tsuma keyubia min ja kenwainsmaki. ²⁴⁻²⁵ Jaskawen taexun ja junin jawen meken bestiwen na jancha MENÉ, MENÉ, TEKEL inun PARSÍN kene netanan, Diosun yunuaki. ²⁶ Na jaska jancha yuiadan, eska yuiaki. Mia yuixunun ninkawe. Ja MENÉ janchadan, min xanen ibukunkainai xaba tibi mia tanaxun janu min mawaxanai Diosun ma mia unainkiki. ²⁷ Ja TEKEL janchadan, Diosun jawen tanatiwen min xankama mia tanaidan, min jawa pemaki. ²⁸ Ja PARSÍN janchadan, janu min xanen ibukin jatu yunubaunaidan, Diosun paxkatan namakis Media nawabu inankin namakis Persia nawabu jatu ibuwamaxanikiki— aka ²⁹ jabiatandi xanen ibujaida jakidi chakabu yuibia xanenibun tadi tashi jushinipa Daniel sawemaxun oro teuti sawemakin teumatan Belsasarín dasibibu jatu yuikin:

—Dabe inun besti xanenibun yunui tsaumis xantukun Daniel ma ebe tsauikiki, xanenibu yununikaidan— akin Babilonia jidabi anu jau jatu yuibaununbun jatu yunua

³⁰ jabias meshu medan Media nawabu detenamenikabu maewan Babilonia anu jikixun Caldea nawa xanen ibujaida Belsasar tenantan ³¹ Babilonia anu Media nawa xanenibu Darío xanen ibujaidai taekainikiaki, 62 año jayadan.

**Mai kini medan inu betsa león puben jiweabu anu
Daniel mistunibukiaki, na janchadan**

6 ¹ Janu jatu yunubaunai anu jau ja xanenibu bexmaskin jatun mai pakea jau mekekubainxanunbun 120 yununikabu xanenibu Daríon jatu katutan ² januxun mai pakea yununikabu jau jabun jatu uinkin pewaxunkubainunbun jaskawen taexun jawen xanenibu benui chakabukatsi ikama 3 xanenibubu betsabu jatu binuabu jatu katudiatan janua xanenibu pewanika betsa Daniel ikunkaini ³ unanepajaidaiwen taexun dayakin ja xanenibu dabe betsa inun yununikabu bexmasbu dasibi jatu binuaiwen taexun xanenibujaida Daríon shinankin: “Ea kachu Daniel xanenibujaida en watidumenkain”, ikaya ⁴ jaska shinain janchai unantan Daniel danankin: “Danielkidi min shinainan, dayai peismaki”, iwanan, xanenibujaida yuikatsi ikin ja xanenibu bexmas dabe inun yununikabun Daniel daya chakai benaibun jakia Daniel juni pepawen taexun jawa yunu chakai bechiabumawen taexun xanen

ibujaida Darío Danielkidi jawa chakabu yuiabumabiaken ⁵jabiaskabiaken Danielki sinatakin danain yuinamei: “Daniel dayai jawa chakabu jayamawen taexun nun ja atidumaki. Jakia jawen mekenika Dios kenwankubainaiwen taexun nun Daniel ja atiduki, chakabuwakinan”, ika

⁶xanen ibujaida Daríobe janchai ja xanen ibu dabe uinkin pewanika inun yununikabu ichapa bui ja bebun mapuxun yuikin:

“Xanen ibuun, jabi min jiweyukunkainxanii, jawa bextekeamadan!

⁷Xanen ibu bexmasbu inun, maewan yununikabu inun, mia medabewanikabu inun, mia dayaxunmisbu nun ichaxun shinanshinaki.

Min xanen ibujaidatun yunuti bena min yunutidu nuku dasibibun eska nun shinaiin. ³⁰xaba kaya jamapai yushin inun dios inun junin

jawen medabewati tsuan yukatidumaki. Kenwankin mia besti jau yukakubainxanunbunwen. Tsuabunda min yunuti jancha ninkakin

mia akabumaken mai kini medan inu betsa león puben jiweabu anu jau jatu udenxanunbunwen. ⁸Nukun jancha min bechipaiaidan, jaska

jatu yunuwe. Media nawabu inun Persia nawabun beya tsuan tede akin keyutiduma chibankin min yunuti jancha mia kenexunabu min kena

kenekin mestenwanwen, jau tsuan betsa wayamaxanunan”, akabu

⁹jaska wabu ninkatan jatu yunua ma kenexunabu jatu bebunxun jawen kena xanen ibujaida Daríon kenekin mestenwankin jatu bisha

bisha axuan ¹⁰jawen yunuti jancha bena jawen kena kenekin Daríon ma mestenwanshina Daniel ninkatan jawen jiwe anu kai jikixun janu uxamis

dintu anu Jerusalénkidi uian xui bepen keyutan xaba tibi dabe inun bestiki jaskakunkainmis keskai Diosbe janchanun ika danti ixun jawen juiwen

kenwankin Diosun medabewati yukakin taewayaya ¹¹jabiatiandi Danielin jiwe anu jatidi xanen ibu bu jikibain jawen juiwen kenwankin Diosun

jau medabewanun Danielin yukai ninkatan ¹²taxnibaini jawen yunuti janchakidi Daríobe janchanun ika buxun ja bebun mapuxun yuikin:

—³⁰xaba kaya jamapai yushin inun, dios inun, junin jawen medabewati tsuan yukatidumaki. Kenwankin mia besti jau

yukakubainxanunbunwen. Tsuabunda min yunuti jancha ninkabuma mai kini medan león puben jiweabu anu jau jatu udenxanunbunwen, akin min

jaska jatu dasibi banabimashinaki, ¿chanimamen?— akabu jatu kemakin Daríon yuikin:

—Jabiaskaki. Media nawabu inun Persia nawabun beya tsuan tede akin keyutiduma chibankin en yunuti jancha jau akin

keyukubainxanunbunwen— jatu wa ¹³januxun ana yuikin:

—Judán enabu Jerusalén anua jatu iwenibu betsa Daniel miki mesekin min jancha ninkama inun min yunuti jancha min jatu banabimashina

jawa ninkamadiki. Jawen mekenika Diosun jau medabewanun xaba tibi yukamis uinkin nun ninkaxuki— akabu

¹⁴Jaska ninkatan juinti nishmajaidai: “¿Daniel jau mawayamanun jawawen en medabewatidumen? paxawakinan”, ikin Daríon benabaunkin badi jikidiama jawen yunuti jancha keneshinabu maewakatsis ikin Daríon bika teneaya ¹⁵jakia ja jabias yununikabu ana bexun ja bebun mapubaunxun Darío yuikin:

—Xanen ibuun, Media nawabu inun Persia nawabun beya chibankin jawen nemati inun jawen yunuti jancha kenea ninkama min kenekin mestenwanmis tsuan tede akin keyutidumaki, min unanjaidaidan— akabu

¹⁶jatun jancha ninkatan jau Daniel itanxun jau mai kini medan inu betsa león puben jiweabu anu jau udenunbun Daríon jatu yunua Daniel putadiabuma Daríon Daniel yuikin:

—Min mekenika Dios chintuanma ninkakin min kenwankubainaitun jau mia mekenunwen, min debuyamanunan— akaya

¹⁷león puben anu Daniel udeanbu mishki sapa ewapa bexun ja kini bepukin Daniel kupiti tsuan betsan bepentiduma wakin bin dekua chabai tuis tuis ikaiwen buyatan jawen meichikiti keneyawen Daríon tsamian xanen ibu bexmas dabetun jabias kadi wanibuki, mishki bepeanbu unanti shada wakinan. ¹⁸Janua jawen jiwe ewapa jawendua anu xanen ibujaida Darío ka jawa piama samakei mimawaibu ninkakatsi ikama jawen dakatiki daka meshu chaitanai Danielkidi shinain uxama ishin ¹⁹penamajaida xabakidanaya bututan mai kini medan león jiweabu anu jawaida kain ²⁰jaki kemaxun kaxa tenexun Daniel kenakin yuikin:

—Daniel, Dios jiweatun dayaduun, ¿min mekenika Dios chintuanma ninkakin min kenwankubainaitun león pubenbu anu mia udenbiabun nemakin mia mekeshinamen?— aka

²¹kini uke medanxun Daniel benimakin jui kushipawen kemakin yuikin:

—Xanen ibuun, ¡jabi min jiweyukunkainxanai, jawa bextekeamadan! ²²Jawen nai tsuma en mekenika Diosun yunua jau ea chakabuwayamanunbun león pubenbu jatu nemakin jatun kexa bepua ea jawa meama ishianbuki. Kanekin mikidi en jawa chakabuwama ishian Diosun unainkiki— aka

²³jaskawen taea benimajaidakin kini medanua dispiwen jau Daniel mapemanunbun xanen ibujaida Daríon jatu yunua ma mapemabu jawen mekenika Dios ikunjaidawaiwen taexun jawa piama tsua uinsisma uiainbun ²⁴januxun ja kachu jabun Danielki chakabuwati shinanshinabu jau jatu itanunbun Daríon jatu yunua ja junibu inun, jatun ain inun, jatun bakebu jatu itanxun león puben anu jau jatu udenunbun jatu yunua jatu uden uden akabu tin idiabuma león ishchukidan achixun jatun xeta inun jatun mentsiswen jatu jaxkakin tseka tseka axun pikin keyuaibun

²⁵januxun yudabu dasibi inun nawa xukuabu betsa betsapa tibi inun jancha betsa betsapawen janchamisbu mai jidabi anu jawen yunuti

jancha jatu bumakin xanen ibujaida Daríon jatu kenemakin yuikin: “Jawa nuitapama unanuma jiwei man mabuyakunkainxanun jaska en matukidi shinaiin. ²⁶Janida en jatu yunubaunmis anuxun Danielin mekenika Dios jawa dananma jau jaki mesekin unankubainxanunbun matu dasibi en jancha en matu yunuaii.

Danielin mekenika Dios jiweaki, ikibi ikadan.
Xanen ibukunkainai tsuan keyukin yamawatidumaki,
jawen kushipa jawa keyutidumadan.

²⁷Chakabu anua kainmakin tsuabuda mekekin piskumatiduki.
Nai anua inun mai anua dami atimaska akin jatu uinmamiski.
León pubenen mentsis nemakin Daniel mekekin piskumashinaki”,

atan dasibibu anu jatu buma akeakenikiaki.

²⁸Darío xanen ibukunkaini inun chipu Persia nawa Ciro xanen ibukunkaindiaitian xanen ibu ja kachu Daniel wadianikiaki.
